



XUNTA DE GALICIA
CONSELLERÍA DE SANIDADE

**PROTOCOLO DE VIXILANCIA E CONTROL EPIDEMIOLÓXICO
FRONTE AO VIRUS SARS-CoV-2 (COVID-19) NO ÁMBITO
EDUCATIVO NON UNIVERSITARIO DE GALICIA**

Dirección Xeral de Saúde Pública

Dirección Xeral de Asistencia Sanitaria

Santiago de Compostela, 16 de Setembro de 2021



Este documento estará en permanente revisión e actualización e dispoñible na páxina web corporativa do Servizo Galego de Saúde a través da seguinte ligazón:

<https://coronavirus.sergas.gal/>

Versión 1: 03/09/2020

Versión 2: 06/10/2020

Versión 3: 09/10/2020

Versión 4: 05/11/2020

Versión 5: 16/09/2021



ÍNDICE

1. OBXECTIVO

2. MANEXO DO CASO SOSPEITOSO

2.1. Abordaxe do caso sospeitoso cando está fóra do centro educativo

2.2. Abordaxe do caso sospeitoso cando está no centro educativo

3. MANEXO DO CASO CONFIRMADO

4. IDENTIFICACIÓN DE CONTACTOS ESTREITOS NO CENTRO EDUCATIVO

4.1. Quen conforma a rede de contactos nos centros educativos?

4.2. Quen son os contactos estreitos nos centros educativos?

5. MANEXO DOS CONTACTOS ESTREITOS IDENTIFICADOS NO CENTRO EDUCATIVO

6. MANEXO DE ABROCHOS (GROMOS) NO CENTRO EDUCATIVO

7. INFORMACIÓN RELACIONADA CO VIRUS SARS CoV-2 E A COVID-19

7.1. Equipos COVID Escolas

7.2. Central de Seguimento de Contactos

7.3. Ante un abrocho escolar

7.4. Recursos e fontes de información para centros educativos



1. OBXECTIVO

O obxectivo deste protocolo é servir de guía para a detección e manexo de casos sospeitosos, casos confirmados, contactos e abrochos de COVID-19 no ámbito educativo non universitario de Galicia.

2. MANEXO DO CASO SOSPEITOSO

2.1. Abordaxe do caso sospeitoso cando está fóra do centro educativo (ANEXO 1)

Todo o alumnado, persoal docente e o persoal non docente deberá realizar diariamente a “Enquisa de autoavaliación clínica do Covid-19”, na que se valoran os síntomas que se presentan con maior frecuencia na COVID-19 (febre maior de 37,5°C, tose seca, dificultade respiratoria, fatiga severa, cansazo, dor muscular, falta de olfacto, falta de gusto, dor de garganta e diarrea), o que permitirá detectar precozmente a sospeita de infección por SARS-CoV-2.

No caso de que **calquera destas persoas presente síntomas compatibles**, independentemente do seu estado vacinal, pasará a ser considerado **caso sospeitoso de COVID-19**. Nesta situación, a persoa con síntomas non deberá acudir ao centro escolar, e deberá informar desta circunstancia ao centro educativo. Así mesmo, deberá pórse en contacto co centro de saúde ou consultorio médico nas seguintes 24h para solicitar unha consulta telefónica co seu pediatra, médico de atención primaria, mutua, ou servizo de urxencias/061 no caso de sintomatoloxía grave. Se non conseguise contactar cos servizos sanitarios, poderá chamar ao 881 00 20 21. Os profesionais sanitarios serán os que valorarán a clínica, e prescribirán a realización das probas que consideren necesarias para confirmar o caso.

Tratarase tamén como caso sospeitoso á persoa sen síntomas que teña un resultado **positivo nunha proba de antíxenos de autodiagnóstico**. Estas persoas non precisan contactar co seu centro de saúde, posto que non requiren valoración da súa situación clínica ao non presentar síntomas. Pola contra, deberán seguir as indicacións do documento [Probas de autodiagnóstico da COVID. Manexo dos resultados](#).



A modo de resumo, as persoas cun resultado positivo nun test de atuodiagnóstico deberán:


- Autodiagnóstico realizado CON supervisión dun farmacéutico --> illamento + esperar a chamada de Saúde Pública.
- Autodiagnóstico realizado SEN supervisión dun farmacéutico e resultado POSITIVO --> illamento + chamar ao 900 400 116.

No caso de que o persoal sanitario prescriba a realización dunha **proba diagnóstica de infección activa (PDIA)**, como pode ser unha PCR ou unha proba de detección de antíxeno realizada por un profesional sanitario, **o caso sospeitoso deberá quedar en illamento domiciliario** seguindo as indicacións do persoal sanitario correspondente. Os **conviventes** dunha persoa considerada caso sospeitoso (alumno/a ou profesional), **evitarán as interaccións sociais que sexan prescindibles** ata que se confirme o resultado. Ademais, os conviventes que non dispoñan dunha pauta de vacinación completa e tampouco foran diagnosticados da COVID-19 nos últimos 6 meses deberán absterse de asistir ao centro educativo ata que se resolva a situación do caso sospeitoso. Tendo en conta isto, as [persoas vacinadas coa pauta completa](#) ou aquelas que fosen diagnosticadas da COVID nos últimos 6 meses poderán acudir tanto á escola como ao seu posto de traballo, extremando sempre as medidas de prevención.

Só poderán suspenderse as medidas de illamento preventivo daquelas persoas consideradas caso sospeitoso sen o resultado negativo dunha PDIA, se o persoal sanitario considera que a clínica non é compatible coa COVID. Nesta situación, a persoa con síntomas poderá continuar coa súa rutina de forma habitual. As persoas consideradas casos sospeitosos por ter un resultados positivos nas probas de antíxeno de autodiagnóstico, sempre deberán realizar unha PDIA antes de suspender as medidas de illamento preventivo.

Para documentar a ausencia ao centro educativo por cuestións sanitarias derivadas da COVID-19 non será necesario ningún xustificante médico, abondará co comprobante dos/as pais/nais ou titores/as legais. As ausencias derivadas desta causa terán a consideración de xustificadas aos efectos do protocolo de prevención de absentismo escolar.

ANEXO 1. CIRCUITO DE ACTUACIÓN ANTE UN CASO SOSPEITOSO FÓRA DO CENTRO EDUCATIVO



2.2. Abordaxe do caso sospeitoso cando está no centro educativo (ANEXO 2)

Todo o alumnado, persoal docente e o persoal non docente que presente sintomatoloxía compatible coa COVID-19 estando no centro educativo (febre maior de 37,5°C, tose seca, dificultade respiratoria, fatiga severa, cansazo, dor muscular, falta de olfacto, falta de gusto, dor de garganta e diarrea) será considerado caso sospeitoso de infección por SARS-CoV-2.

Aqueles casos sospeitosos que poidan facelo, deberán pórse unha máscara cirúrxica e abandonar o centro para dirixirse ao seu domicilio, onde deberán quedarse en illamento. No caso de persoas que precisen ser acompañadas, deberán ser trasladadas á sala habilitada para o illamento, levando posta unha máscara cirúrxica e acompañados dun profesor que tamén levará máscara cirúrxica. Como excepción, se a persoa considerada caso sospeitoso non pode usar a máscara cirúrxica, a persoa acompañante utiliza-



rá unha máscara tipo FFP2 xunto cunha pantalla. A sala de illamento deberá ter unha ventilación axeitada e estar provista de xel hidroalcolico, panos desbotables e papeleira de pedal.

Esta situación debe ser notificada ao responsable do **Equipo COVID do Centro Educativo (ECCE)**, que deberá informar da situación á familia ou persoa de referencia do caso sospeitoso (pais, titor etc.). Esta persoa deberá presentarse no centro a maior brevidade posible para levalo ao seu domicilio.

A continuación, a familia, persoa de referencia ou o propio paciente deberá pórse en contacto co centro de saúde ou consultorio médico nas seguintes 24h para solicitar unha consulta telefónica co seu pediatra, médico de atención primaria, mutua, ou servizo de urxencias/061 no caso de sintomatoloxía grave. Se non conseguise contactar cos servizos sanitarios, poderá chamar ao 881 00 20 21. Os profesionais sanitarios serán os que valorarán a clínica, e prescribirán a realización das probas que consideren necesarias para confirmar o caso.


Se por calquera motivo unha persoa sen síntomas se realizase un test de antixenos de autodiagnóstico no centro educativo e obtivese un resultado positivo, esta persoa tratarase como un caso sospeitoso e deberá seguir o procedemento descrito previamente. A diferenza dos casos sospeitosos que presentan síntomas, estas persoas non precisan contactar co seu centro de saúde, posto que non requiren valoración da súa situación clínica ao non presentar síntomas. Pola contra, deberán seguir as indicacións do documento [Probas de autodiagnóstico da COVID. Manexo dos resultados](#), no cal se menciona que ante unha proba positiva de autodiagnóstico realizada SEN supervisión dun farmacéutico, a persoa considerada caso sospeitoso deberá illarse e chamar ao 900 400 116.

No caso de que o persoal sanitario prescriba a realización dunha PDIA, o caso sospeitoso continuará en illamento domiciliario seguindo as indicacións do persoal sanitario correspondente. Os conviventes dunha persoa considerada caso sospeitoso (alumno/a ou profesional), evitarán as interaccións sociais que sexan prescindibles ata que se confirme o resultado. Ademais, os conviventes que non dispoñan dunha pauta de vacinación completa e tampouco foran diagnosticados da COVID-19 nos últimos 6 meses deberán absterse de asistir ao centro educativo ata que se resolva a situación do caso sospeitoso. Tendo en conta isto, as [persoas vacinadas coa pauta completa](#) ou aquelas que fosen diagnosticadas da COVID nos últimos 6 meses poderán acudir tanto á escola como ao seu posto de traballo, extremando sempre as medidas de prevención.



Só poderán suspenderse as medidas de illamento preventivo daquelas persoas consideradas caso sospeitoso sen o resultado negativo dunha PDIA, se o persoal sanitario considera que a clínica non é compatible coa COVID. Nesta situación, a persoa con síntomas poderá continuar coa súa rutina de forma habitual. Os casos sospeitosos de persoas con resultados positivos nas probas de antíxeno de autodiagnóstico sempre deberán realizar unha PDIA antes de suspender as medidas de illamento preventivo.

ANEXO 2. CIRCUITO DE ACTUACIÓN ANTE UN CASO SOSPEITOSO NO CENTRO EDUCATIVO





3. MANEXO DO CASO CONFIRMADO (ANEXO 3)

No caso de que a **PDIA** solicitada **resulte positiva**, o caso sospeitoso pasará a considerarse **caso confirmado de COVID-19** e os profesionais sanitarios de atención primaria poranse en contacto co paciente ou a súa persoa de referencia para informar deste resultado, realizar o seguimento clínico e facer fincapé nas medidas hixiénicas e de illamento. Ademais, se as condicións socio-sanitarias o permiten, e o paciente ou a persoa de referencia da o seu consentimento, serán incluídos na plataforma TELEA para o seguimento do paciente de forma telemática.

A persoa diagnosticada da COVID-19 continuará co illamento domiciliario ata levar 3 días sen síntomas e sempre que pasasen 10 días desde que estes comezaron. Se non tivo síntomas, deberá manter o illamento ata pasados 10 días desde a recollida da mostra diagnóstica. Non será necesario realizar unha nova PDIA para suspender as medidas de illamento nin para reincorporarse á actividade laboral. En todo caso, o caso confirmado sempre deberá seguir as indicacións dos profesionais sanitarios que se encarguen do seu seguimento clínico.

4. IDENTIFICACIÓN DE CONTACTOS ESTREITOS NO CENTRO EDUCATIVO

Para comezar a identificación de contactos estreitos relacionados co centro educativo o antes posible, recomendase que o caso confirmado ou a persoa de referencia notifique o resultado positivo ao centro. Deste xeito, o responsable do ECCE poderá comezar a recompilar a información necesaria para a identificación dos **contactos estreitos**.

Sempre que ao responsable do ECCE se lle notifique que existe unha **persoa cun diagnóstico confirmado de COVID-19 no centro de ensino**, deberá pórse en contacto coa **Central de Seguimento de Contactos (CSC)** para identificar os contactos estreitos do ámbito educativo. Poderá facelo a través do número de teléfono específico para educación, habilitado de 9 a 22h todos os días da semana e que está dispoñible en EduCovid, na Axuda da aplicación, así como tamén nos apartados Equipo e Centro médico.

Como ocorre con calquera outro caso confirmado de COVID, a CSC porase en contacto co caso confirmado ou coa persoa de referencia, para facilitarlle as indicacións de illamento, realizar a enquisa



epidemiolóxica e identificar os contactos estreitos do ámbito persoal do caso. Durante esta enquisa epidemiolóxica identifícase ao caso confirmado como estudante ou traballador dun centro de ensino. Deste xeito, unha vez localizado o centro, a CSC envía unha notificación ao responsable do ECCE, a través da **aplicación EduCOVID** solicitando os contactos estreitos do caso que se produciran no ámbito educativo. Neste momento, se previamente non se fixo, o responsable do ECCE deberá **pórse en contacto coa CSC a través do número de teléfono que está dispoñible en EduCovid, na Axuda da aplicación, así como tamén nos apartados Equipo e Centro médico.**

Sempre será a CSC a que cargará a petición de contactos en EduCOVID, para o que identificará ao caso coa correspondente IdOrixe. Se a CSC atopa dificultades para localizar ao caso no centro concreto, facilitaralle a IdOrixe ao responsable do ECCE e pediralle que realice a súa carga en EduCOVID.

En ningún caso se notificarán contactos estreitos por medios diferentes a EduCOVID. No caso de centros educativos que non dispoñan de EduCOVID, o responsable COVID do centro deberá pórse en contacto coa CSC e seguir as indicacións que os rastreadores lle faciliten.

O persoal da **CSC axudará ao responsable do ECCE a identificar e elaborar a listaxe de contactos estreitos** do caso. Estes contactos estreitos poderán seleccionarse da “Rede de contactos” proposta por EduCOVID (apartado 4.1), na que se inclúen compañeiros de clase, de comedor, de transporte, profesorado e outros (coma os recreos, etc...). Existe a posibilidade de que algún contacto estreito do caso non se atope dentro desta rede de contactos, polo que o responsable do ECCE deberao incorporar de forma manual. Unha vez definida a listaxe de contactos estreitos, e tras ser acordada co persoal asignado da CSC, o responsable do ECCE enviará a listaxe de contactos estreitos á CSC a través da aplicación EduCOVID.

No caso de que, conxuntamente coa CSC, non se identifiquen contactos estreitos no centro, premerase igualmente o botón “Notificar a Sanidade” **sen seleccionar a ningunha persoa**. Deste xeito, o estado do expediente pasará de “Petición de contactos” a “Contactos comunicados”, coa correspondente traza temporal.

No descrito previamente asúmese que, se é **o responsable do ECCE quen lle notifica á CSC que no centro existe unha persoa cun diagnóstico confirmado de COVID-19**, a CSC pode verificar esta

información. Pode ocorrer que á CSC aínda non dispoña da información necesaria para facelo, polo que nesta circunstancia procederase do xeito seguinte:

- 1 Unha vez recibida a notificación, a CSC axudará a buscar indicios que verifiquen que se trata dun caso confirmado de COVID. Se non hai información abondo que permita descartar o caso, o responsable do ECCE cargará o caso en EduCOVID co **IdOrixe 0000**. Isto indicará que o caso aínda non está verificado.
- 2 Despois, procédese a identificar aos posibles contactos estreitos coma en calquera outro caso confirmado e **gárdanse, pero non se notifican**. Deste xeito, á CSC non lle chegará a listaxe de contactos estreitos e será o director do centro quen adiante esta información aos posibles contactos estreitos (a eles e só a eles). O director informará ás persoas afectadas que, conxuntamente coa CSC, determinouse que moi probablemente son contactos estreitos dun caso confirmado de COVID-19.
- 3 Entre tanto, o resultado positivo chegará á CSC e haberá unha IdOrixe válida. Nese momento, a CSC chamará ao centro e facilitaralle esta IdOrixe, para que o responsable do ECCE modifique o Id 0000 polo IdOrixe real. Unha vez feito isto, o centro educativo notificará a listaxe de contactos estreitos a través da aplicación e procederase de forma habitual, onde a CSC chamará aos contactos estreitos para enquisalos e iniciar o seguimento.


En todo este proceso, esixirase extremar a confidencialidade profesional acerca da información da persoa diagnosticada da COVID.

4.1. Quen conforma a rede de contactos nos centros educativos?




A rede de contactos esta formada por aquelas persoas situadas a menos de 2 metros da persoa da que se define a rede. Esta rede de contactos, previamente definida polo ECCE na plataforma EduCOVID, facilitará a labor de identificar os contactos estreitos ao responsable do ECCE en caso de ser necesario.

1. **No caso do transporte escolar:** establecerase un radio de 2 metros para a identificar a rede de contactos de cada un dos/as alumnos/as. Isto tradúcese en 2 asentos en todas as direccións desde onde se senta á persoa da que se define a rede de contactos. Entenderase o oco do corredor como 1 asento.



2. **No caso de aulas, laboratorios, comedores e outros espazos:** adoptarase o mesmo criterio do radio de 2 metros arredor da persoa. Isto acostuma a implicar ás persoas sentadas nos asentos contiguos, en todas as direccións, da persoa da que se define a rede de contactos.





4.2. Quen son os contactos estreitos nos centros educativos?

A identificación dos contactos estreitos nos centros educativos implica a avaliación individualizada de certas variables, como pode ser o uso adecuado da máscara ou a adecuada ventilación do aula. Polo tanto, para levar a cabo esta identificación, será necesaria a colaboración entre o responsable do ECCE e a CSC.

Os criterios xerais para a identificación dos contactos estreitos en centros escolares son os seguintes¹:

- **No primeiro ciclo de educación infantil (0 a 3 anos)** entenderase, de forma xeneralizada, como contacto estreito a todas as persoas pertencentes ao grupo de convivencia estable, dado que neste ciclo non hai obriga da utilización da máscara. Nesta situación será necesaria unha valoración individualizada das interaccións entre as diferentes persoas que conforman o grupo para poder definir que persoas son contacto estreito do caso confirmado.
- **Para os niveis do segundo ciclo de educación infantil (3 a 6 anos) e restantes por encima dos 6 anos**, identificarase como contacto estreito a calquera persoa que puidese compartir espazo co confirmado a unha **distancia <2 metros** arredor do caso durante **mais de 15 minutos**, salvo que se poida asegurar que se realizou un **uso adecuado da máscara por ambas partes**. A avaliación do uso adecuado da máscara será realizada polo profesor/titor da aula e/ou o responsable do ECCE, seguindo as instrucións da CSC.
- **Calquera profesional do centro educativo**, profesor ou outro traballador que compartise espazo cun caso confirmado a unha distancia <2 metros, durante máis de 15 minutos e sen a utilización correcta da máscara por algunha das partes.


O **período de transmisibilidade** a considerar para a identificación de contactos estreitos é, nos casos sintomáticos, dende 2 días antes do inicio de síntomas do caso ata o momento no que o caso é illado. Nos casos asintomáticos, os contactos buscaranse dende 2 días antes da data da recollida da mostra que permitiu o diagnóstico.

¹ Nos contactos estreitos en centros escolares non se inclúen os contactos domiciliarios, malia que tamén podan ser contactos estreitos no centro, posto que a CSC xa os identifica durante a enquisa ao caso confirmado.



O responsable COVID do centro educativo non deberá ter en conta o estado de vacinación nin o diagnóstico previo da COVID para elaborar a listaxe de contactos estreitos, sendo esta función asumida polos axentes da CSC. Estes axentes revisarán os rexistros sanitarios de cada contacto estreito durante o inicio do seguimento e adaptarán as medidas que deben seguir en función da información dispoñible.

ANEXO 3. CIRCUITO DE ACTUACIÓN ANTE UN CASO CONFIRMADO DE COVID





5. MANEXO DOS CONTACTOS ESTREITOS IDENTIFICADOS NO CENTRO EDUCATIVO

As persoas incluídas na listaxe de contactos estreitos remitidas á CSC a través de EduCOVID, recibirán unha chamada da propia CSC indicándolles que medidas de prevención deben seguir. Esta chamada non ten porque ser inmediata e pode demorarse ata o día seguinte, polo que se recomenda que o responsable do ECCE notifique á comunidade educativa a existencia dun caso positivo relacionado co centro, tendo sempre en conta a necesidade de manter a confidencialidade da persoa diagnosticada da COVID.

De igual xeito, e para evitar demoras nas actuacións, o responsable do ECCE deberá realizar unha primeira notificación ás persoas identificadas na listaxe de contactos estreitos remitidas á CSC a través de EduCOVID. Nela, indicarlles que foron considerados contactos estreitos dun caso positivo, motivo polo cal deberán extremar as medidas de prevención e esperar a chamada da CSC na que se lles facilitará información individualizada. A modo informativo, indicaráselles a estas persoas que os contactos estreitos de casos confirmados de COVID-19 deben permanecer en corentena, exceptuando aqueles que estean completamente vacinados ou pasaran a COVID-19 hai menos de seis meses. Tamén se informará de que pese a estar correctamente vacunado ou ter sido positivo de COVID, deberán permanecer en corentena se padecen algunha inmunodepresión.

- **Corentena domiciliaria:**
 - Deberán gardar corentena domiciliaria todos os contactos estreitos de casos confirmados de COVID-19 que non estean [completamente vacinados, non pasaran a COVID-19 nos últimos 6 meses ou estean inmunodeprimidos](#).
 - Aínda que non é frecuente, as autoridades de saúde pública poden indicar medidas de corentena aos contactos estreitos aínda que estean completamente vacinados ou pasasen a COVID nos últimos 6 meses se consideran que a infección do caso confirmado se debe a unha variante do SARS-CoV-2 de maior impacto ou interese ou se hai sospeita de que a infección se adquiriu dun visón.



- Estas persoas deberán absterse de acudir ao centro educativo, debendo permanecer no domicilio en corentena á espera dunha chamada da CSC na que se lles facilitará mais información.
- A realización da corentena implica a necesidade de que o contacto estreito colabore no seguimento que realizará a CSC da súa situación clínica e realice as probas diagnósticas que esta lle indique.
- **Vixilancia por contacto estreito:**
 - Están exentos de medidas de corentena domiciliaria os contactos estreitos de casos confirmados de COVID-19 que estean completamente vacinados ou pasasen a COVID-19 hai menos de seis meses, sempre e cando non estean inmunodeprimidas.
 - Estas persoas poden saír do domicilio e acudir ao centro educativo, pero **deben extremar as medidas de prevención e control, facendo sempre uso da máscara cando compartan espazo con outras persoas** e non manteñan unha distancia mínima de 2 metros.
 - A vixilancia por contacto implica tamén evitar interacción con persoas vulnerables, vixiar a posible aparición de síntomas e realizar todas as probas que a CSC solicite.
 - As persoas en vixilancia deben estar localizables e seguir as indicacións que a CSC lle dará por teléfono, evitando saír de Galicia e realizar grandes desprazamentos.
 - **Se polo motivo que fose non puidesen realizar as medidas de prevención e control anteriores, incluídas as probas PCR, estas persoas deberán realizar unha corentena domiciliaria.**

De forma xeral, todas as persoas que tiveron un contacto estreito cun caso COVID deben realizar PDIA durante o seguimento das medidas de corentena/vixilancia. Estas PDIA acostuman a ser unha PCR ao inicio e, se esta primeira é negativa, unha segunda PCR que permita finalizar a corentena ou vixilancia con seguridade. Polo tanto, toda persoa identificada como contacto estreito dun caso confirmado, independentemente de que sexa traballador ou estudante dun centro educativo ou pertenza a calquera outro colectivo, deberá permanecer en corentena ou vixilancia ata que obteña o resultado negativo da PCR



que se solicitará transcorridos 10 días do último contacto co caso confirmado. Se, polo motivo que fose, pasan 14 días do último contacto co caso confirmado e non se realiza a PCR, a corentena finalizará igualmente.

É importante saber que, ao igual co resto da poboación xeral, **estarán exentos de corentena e vixilancia aquelas persoas que fosen diagnosticadas coma caso confirmado de COVID-19 nos últimos 3 meses**. Esta situación non ten que ser identificada polo responsable do ECCE, senón que serán os propios contactos estreitos ou as súas persoas de referencia quen trasladen esta información á CSC cando se lle realice a primeira chamada de inicio da corentena.

De igual forma, compre recordar que **os conviventes de contactos estreitos que non tiveron contacto estreito co caso confirmado, poden continuar coa súa vida habitual**. Nese caso o contacto estreito deberá separarse, na medida do posible, do resto dos conviventes. No caso de estar en corentena, recoméndase que esta se realice nunha habitación individual.

Una vez estudados os contactos e establecidas as medidas de corentena ou vixilancia para aqueles considerados como estreitos, as actividades docentes continuarán de forma normal, extremando as medidas de precaución.

As persoas catalogadas como contactos estreitos poderán solicitarlle á CSC un xustificante que lles permita acreditar a súa situación de contacto en corentena ou contacto en vixilancia segundo corresponda.

6. MANEXO DE ABROCHOS (GROMOS) NO CENTRO EDUCATIVO

Considerarase **abrocho** nun centro educativo a calquera agrupación de **3 ou mais casos con infección activa nos que se establecese un vínculo epidemiolóxico**. Debe mencionarse que o escenario de aparición de casos da COVID-19 en relación con centros educativos pode ser moi variable, podendo aparecer casos nunha única clase sen que a transmisión do virus se producise no centro escolar. Do mesmo xeito, tamén pode ocorrer que aparezan casos en diferentes clases e si exista vínculo entre eles e o centro educativo. Tendo en conta esta importante variabilidade entre as diferentes situacións, sempre que se detecten 3 casos ou mais nun centro escolar nun período corto de tempo (menos de 14 días entre o pri-



meiro e o último caso) deberá realizarse unha valoración da situación por parte das autoridades sanitarias. Polo tanto, de detectarse esta situación, deberá ser notificada á **Xefatura Territorial (XT) de Sanidade** da provincia do centro educativo ou, no seu defecto, ao **Servizo de Alerta Epidemiolóxica de Galicia (SAEG)**.

Será o persoal da CSC quen faga esta notificación e decida co persoal da XT ou do SAEG se é necesario levar a cabo algunha actuación extraordinaria. Neste caso, a XT de Sanidade ou o SAEG porase en contacto co centro educativo para facilitar as indicacións que precise para o manexo do abrocho. Dada a especial relevancia e risco que pode supoñer un abrocho, neste caso poderá ser necesario tomar medidas adicionais coma o peche dunha ou varias aulas, peche do centro educativo, cribados no centro escolar etc.

7. INFORMACIÓN RELACIONADA CO VIRUS SARS CoV-2 E A COVID-19.

7.1. Equipos COVID Escolas

Os equipos COVID escolas están formados polos profesionais sanitarios do centro de saúde considerado como referente para cada centro docente. Os ECCE poderán consultar dúbidas que poidan ter relación co virus SARS-CoV-2 e a enfermidade COVID-19. Se non fose posible contactar con este equipo pódese chamar ao número de información sobre a COVID en Galicia: 900 400 116.

7.2. Central de Seguimento de Contactos

A CSC é a encargada de realizar as enquisas epidemiolóxicas aos casos e identificar os seus contactos estreitos. Deste xeito, e como o seu propio nome indica, a CSC realiza os seguimentos das persoas en coarentena e en vixilancia, solicitando as PDIA que precisen.

Se o centro educativo ten dúbidas sobre o manexo de contactos no centro escolar, deberá chamar ao persoal da CSC asignado a tal fin (de 9 a 22h todos os días da semana) no teléfono que está dispoñible en EduCovid, na Axuda da aplicación, así como tamén nos apartados Equipo e Centro médico .



7.3. Ante un abrocho escolar

Ante as posibles dúbidas que o manexo dun abrocho poida xerar, o responsable do ECCE pode chamar á Xefatura Territorial de Sanidade da provincia na que se atope o centro educativo (de 8 a 15h de luns a venres) ou Servizo de Alerta Epidemiolóxica de Galicia (de 15h a 8h de luns a venres e 24h fin de semanas e festivos).

7.4. Recursos e fontes de información para centros educativos

Os conceptos que se usan neste documento e as súas definicións están en constante revisión, polo que pode que varíen ao longo do tempo. Pode consultar as definicións dos seguintes conceptos actualizadas Na seguinte [\[ligazón\]](#) pode consultar as definicións actualizadas dos conceptos: caso sospeitoso, caso confirmado con infección activa, contacto estreito, vacinación completa, persoa inmunodeprimida e reinfección.

Tamén pode consultar os recursos formativos elaborados pola Consellería de Sanidade co obxectivo de ofrecer os coñecementos necesarios aos equipos COVID e á comunidade educativa que permitan unha maior seguridade e información ao conxunto da comunidade educativa [\[ligazón\]](#).

Por último, dispón de información específica sobre as medidas de illamento que se lle facilitan aos casos sospeitosos e confirmados, así como as medidas de vixilancia ou corentena que se lle facilitan aos contactos estreitos en Galicia. Pode consultalas especificamente premendo sobre cada un dos seguintes apartados:

- [Probas de autodiagnóstico da COVID. Manexo dos resultados.](#)
- [Caso sospeitoso: medidas de illamento no domicilio.](#)
- [Caso confirmado: medidas de illamento no domicilio.](#)
- [Información para contactos estreitos en corentena.](#)
- [Información para contactos estreitos en vixilancia.](#)
- [Criterios de alta do illamento.](#)



ALGORITMO DE ACTUACIÓN ANTE CASOS DA COVID-19 EN CENTROS EDUCATIVOS

